

NUPEKO IRAKASLE ETA IKASLEAK HASERRE EUSKARAREN INGURUAN AGINTARI AKADEMIKOEK DUTEN JOKAERAGATIK

«Errektore talde honek alde egin arte ez dugu hizkuntz plangintzarik izanen»

■ Hizkuntz plangintzaren inguruan NUPeko errektoretza taldeak daraman politika arbuia dute ikasle eta irakasleek

■ Antonio Perez Pradosek zuzentzen duen taldeak UPNko Gobernuarekin harremana duela diote

■ Egun unibertsitatea zuzentzen duen taldeak postua utzi arte hizkuntz plangintzarik ez dela izanen uste dute denek

Iñaki Petxarroman / **Iruñea**

NUP-EKO hizkuntz normalizazio plangintzaren arrastorik ez dago. EGUNKARIAK atzo aurreratu bezala, hizkuntz normalizaziorako plangintzaren aldeko emaitzak agertu zituen IKEI etxearen txostena geldiarazita dauka, nahita, Unibertsitateko Gizarte Kontseiluak. Emaitza «onegiak» direnez, hainbat adituren iritziarekin osatu nahi dute inkesta. Aditu horien tartean daude Jon Juaristi eta Aurelio Arteta. Hirugarren plangintza proposamena, beraz, berriz aurrera egin ezinean geratuko dela dirudi. Duela lau urte errektore talde berria sartu zenean onetsia zegoen plangintza atzera bota zuen. Ondoren, beste plangintza bat abiatu zuten, eta hura ere ez zen agintarien gustukoa izan. Azkenik, Gregorio Monrealek bultzaturik, azken eginahala izan zen, baina hura ere kaxoien batean geratu zen.


Juan Cruz Alli • NUPeko irakasle eta CDNko lehendakaria

«Abegi ona diote Gobernuari gai honetan»



► Juan Cruz Alli oso harrituta agertu zen hizkuntz plangintza osatzeko eman den azken pausorekin. «Eta, zertarako emanen diete Juaristi eta Artetari, ezetz esan dezaten, ezta? Gainera, talde horretan dagoen aniztasuna ikusita, arraro iruditzen zait formula komun batera iritsi ahal izatea». Hala ere, Allik uste du hurrengo urte akademikoa arte ez dutela deus eginen.

Allik ontzat jo du Nafarroako Justizia Auzitegi Nagusiak berriki emandako epaia. Epaian dio Gobernuak legez kanpo jokatu zuela NUPeko hainbat estatutu aldatzean, unibertsitate autonomia ez zuelako errespetatu. Euska-



MIKEL UHATE

Bai Euskarari kanpainaren barruan NUPen egindako ekintza.

rari dagokion estatutua ere aldatu zuen, besteak beste.

Allik uste du agintari akademikoek abegi ona egiten inguruan egiten dituen presioei. «Gobernua presio zuzenaren bidez saiatu izan da euskararen plangintza eragozten, eta aurrerantzean ezin badute horrela, argudio ekonomikoa aterako dute, plangintza garestiegia dela esanez». Aurreko hizkuntz normalizaziorako batzordeak aurkeztu zuen plangintzaren alde agertu da Alli.

Alejandro Arizkun •

Hizkuntz Normalizaziorako zuzendari ohia

«Hizkuntz normalizazioa eragozteko apustua dute»



► Aurreko errektoretza taldeak prest zuen hizkuntz normalizaziorako plan bat Antonio Perez Pradosen taldea iritsi aurretik. Plana onetsia zegoen, eta horretan aritu zen taldeko zuzendari izan zen Alejandro

Arizkun NUPeko irakaslea. «Eguno errektoretza taldeak oso garbi utzi du ez duela hizkuntz normalizazio politikarik martxan jarri nahi. Horregatik, oso ezkor naiz». Arizkunek uste du hizkuntz normalizazio plan bat izateko errektore talde berria osatu beharko dela, egungoak normalizazioa eragoztearen aldeko apustua egin duelako.

Arizkunen irudiko, kasu askotan errektore taldea Gobernuaren ordezkari gisa jokatzen ari da, eta ez unibertsitatearen autonomia printzipioan oinarriturik.

Gregorio Monreal •

NUPeko irakaslea

«Izen horiek baieztatuz gero, probokazio hutsa litzateke»



► Gregorio Monreal Errektoretzak atzera bota zuen azken hizkuntz plangintzaren proposamena egin zuen taldeko kide zen. Orain, haserre ikusten du egoera, eta hitz gogo-

rrak ditu. «Esaten dituzten izen horietako batzuk baieztatuko balira, probokazio hutsa litzaidake. Horrelako talde bateko kide izateko hizkuntza ezagutu beharko da, edo koalifikazioen bat izan, ikuspuntu juridiko edo linguistikotik. Baina koalifikazioa bada hizkuntzaren kontrako aurreiritzi ideologiko-patologikoak izatea, bada, horrek esan nahi du ez dagoe la batera borondaterik arazoa konpontzeko».

Hala ere, Monrealek argi du errektoretza taldeak hasieran agindu zuena bete egin duela. «Zuzendaritza taldean bada jendea hizkuntzaren kontrako iritziz zuzenak dituen. Horregatik, ez daude prest arau unibertsitarioak betetzeko, Nafarroako Auzitegi Nagusiak berretsi dituen arauak hain zuzen. Hauek kargura iristeko adierazi zuten han eta hemen hizkuntz normalizazio plangintzari galga jarriko ziotela, eta hala egin dute». Gainera, Monreal beldur da datozen hauteskundeetara begira ez ote duten gauza bera eginen, beren bezeroen botoka eskuratzeko.

Ainara Armendariz •

Iako kidea

«Egoera jasanezina da»

► «Guk uste dugu badaramagula denbora pila bat egoera honetan, eta ezin dugula gehiago jasan», dio haserre Iako kideak. NUPen dauden 10.000 ikasleetatik 2.000 inguru euskaldunak direla dio: «Jasanezina da gertatzen ari dena, eta hau nonbaitetik lehertuko da». Armendarizek gogoratu du errektoretza taldeak ahalegin guztiak egin dituela euskarak aurrerapausorik eman ez dezan unibertsitatean, eta horregatik, ikasleek ahal duten presio guztia eginen dutela adierazi du.

Koldo Asiron • NUPeko

euskara teknikaria

«Hauek alde egin arte, jai dugu»



► Errektoreak sortu zuen Hizkuntz Normalizaziorako Batzordeko kide izan zen, eta gainerako kideekin batera dimisioa aurkeztu zuen haien lanak deusestarako balio ez zuela ikusirik. Egun, ikuspegi ezkorra du: «Orain lau urte igaro dira, eta lehen bezala edo lehen baino okerrago gaude». Horregatik, Koldo Asironek uste du «haien ikuspegitik ikusita» gauzak oso ongi egin dituztela NUPeko agintariek. «Milaka azterketa egin dira, milaka plangintza, hamaika batzorde sortu eta desagertu dira. Deus ez da egin, eta egiten dudan balorazioa da zoriontzeko moduko jardura egin dutela haiek. Horixe da etsita dagoen baten balorazioa».

Koldo Asironek argi du UPNko Gobernuarekin «sintonia osoan» jokatu dutela, eta ziur da gauza batez: «Hauek hemen dauden bitartean jai dugu. Irtenbide bakarra hauek alde egitea da; ondoren, ikusiko dugu».